

Bonkanda ele basi Kolosai

Tshapita 1

1 Paulo, ekima enda Kilisito Yeso ma esangyelo ena Nkumundjeyi, la Timote wina ondiso, 2 ele bain'andiso, bakidiyami banda dikotomedya banda Kilisito bayadi nda Kolosai. Diyota ele inyo o la wee m'ele Nkumundjeyi, Apha endiso, la m'ele Nkumu Yeso Kilisito.

3 Tuteya Nkumundjeyi elunga, Ishe ena Nkumu endiso Yeso Kilisito, betsho beuma eyad'isho alotshelaka, 4 m'akiso wokaka bosako bonda yimedya eninyo ele Kilisito Yeso, la lolango lokinyo wokaka bakidiyami bauma, 5 l'oloko bonda dilindedya dimbolambedyama nda loola, dikinyo wokaka nd'oso nda djoji inda soosolo inda bosako bond'olotshi bondoyakaki ele inyo, 6 sh'eki boko ayakaka ele asi motshi bauma o la boyadi ditshweki mammo, o la boyadi diphulaka nd'atei anda inyo ma wina bokinyo wokaka la bokinyo weyaka diyota dina Ndjambi soosolo; 7sh'eki inyo weyaka m'ele Ephaphola, wina bondiso bontamba, bondoyadi o la bonkambi bonda dikotomedya bonda Kilisito ele inyo; 8 andi otosangelaki djoji inda lolango loninyo na Nyuma.

9 Sheko o la isho topholemvwe dilotshela ma wina bok'isho wokaka djoji inda yimedya eninyo la lolango loninyo; toloondela inda inyo dilodyama la weyi bonda esangyelo enandi la mpima bya la bolephwa bona Nyuma, 10 inda inyo dikomana inda dikenda nd'oso ona Nkumu la yoshashadya la baosi baninyo bauma, nda ditshwa mammo inda bekeledi benda bolotshi beuma, o la nda disekwa la weyi bonda soosolo bona Ndjambi; 11 inda inyo dikemba la mpamba bya nda iyedi inda ekembyelo enandi enda ditombya, inda inyo diyala la mpitshi bya la ditshidi la boshadu. 12 Tuteya Apha endiso elunga; andi otokomanyaki inda isho dikita bokitshwa bonda bakidiyami banda iyani. 13 Andi ototshongolaki ma mpamba enda widima, ko andi aotolekya nda waphemelo bonda Bona bonandi bondokandi lolango. 14 Tolamba eshikwelo endiso ma bolungu bonandi, o la ephophyelo enda bembe; 15 andi ale diwanyana dina Nkumundjeyi endophenye nda baisho; andi ale nsomi enda etongelo euma. 16 L'oloko bonda djomba diuma itongamaki m'ele andi, o la diko dile nda loola o la diko dile nda bokidi; o la diko dipeyi yenama o la diko diyadi yenamaka; nkula bekala benda yapemelo, nkula bankumu, nkula bakotamedi, nkula bakulaki; djomba diuma itongamaki el'andi, la diko indotongamelaki phe nko andi; 17 l'andi ayadi nd'oso bonda djomba diumela, la djomba dinkumela dile nda bakata banandi. 18 L'andi ayadi botsha bonda djongi, diko diyadi Ekelezia; andi ayadi angolelo, nsomi enda baiko betshwa ma

bewedi, inda andi diyala la etetenyi end'oso enda djomba diumela. 19 Djoindanda elodyamelo enda bya eshashalaki yulama el'andi: ko akiandi akomanyaka baoidanda wee la bolungu bonandi nda kuruse djoindanda yekejanya djomba diumela el'andi menge, o la djomba dile na motshi o la djomba dile nda loola; 21 o la inyo, onangana l'andi nd'oso, ondoyaki batonyi banandi na nkanedya ininyo la bekeledi beninyo ben'embe, etambene andi aolekesanya o la inyo l'andi, 22 la djongi dinandi la bewedi bonandi djoindanda dilokokomedyand'oso bonandi shenda basi ekila, bapha la mbalaka nda baisho banandi: 22 nkina lokotshidingana la yimedya soosolo, la bokemba la bokokomela, nkina lophimi ma dikutela inda bosako bonda bolotshi, bok'inyo wokaka, boko bondotshangwaki nda etongelo eumela eyadi n'ase banda loola; emi Paulo ndjadi bonkambi bonda bosako boiko.

24 Etambene ndoshashala la elu elokindel'emi, nsholodya empudi etshiki enda loshilingi londa Kilisito nda djongi dinami, loshilingi lokiandi ashingelaka djongi dinandi, diko diyadi Ekelezia; 25 emi mboyala bonkambi bond'eko sh'eyadi mpipho eki Nkumundjeyi ankaaka ena emi dikokya djoindanda Nkumundjeyi; djoindanda diko inda ishimo ikiandi wishaka ma dikeki la ndjotshwelo; diko dikiandi wisholaka ele bakidiyami banandi nda ekeki ene. 27 Nkumundjeyi aolanga dilongombodya diyonga dina bonene dinda ditombya dinandi dinda ishimo ine nd'atei anda basi benanga; iko ine mbo, Kilisito ayadi nda betema beninyo, ilindedya inda ditombya. 28 Tolosisela djoindanda dinandi nda dilopola, o la nda yekya bonto l'onto nda djoindanda dinda Kilisito. 29 Dika diko nshokamba bolimo la bokemba, ndjadi yunaka boshela shene enkembya mpamba enandi, and'iko ayadi dikambaka nda botema bonami.

Tshapita 2

1 L'oloko bon'emi nanga inyo yeya boshela bonunemi nda ditshina in'inyo la basi Laodikiya, o la bankina batophenana l'emi nda elongi; 2 inda iyo ditengengala nda betema bendiyo, la dimamana nda diyota o la nda diyonga dinda bophokola bonda weyi; inda iyo yotshwa uduwe nda djoindanda ine inda ishimo ina Ndjambi: 3 diyonga dinkumela dina mpima la weyi dimbishama nkoko. 4 Nshotephela ngaiko, bonto bophoyolungusanya la baoidanda bana ngombo. 5 Sheko, nkula emi mpoyadi d'inyo nda djongi, ndjadi d'inyo nda bodimo, la ndoshashala anenemi ephongelo eninyo enda baoidanda baninyo, la dikotomedyandanda yimedya eninyo ele Kilisito.

6 Nda boloko bone, sh'eki inyo wimedyaika Kilisito, Yeso Nkumu, losembaka l'andi; 7 lokembaka ele andi, lolodyamaka ele andi,

lokokomelaka nda yimedya sh'eki inyo wekaka, lopindaka dikemba nkoko nda yuteya elunga.

8 Lophalaka bolotshi, bonto ophoyolokodya shenda bantamba banandi la nkanedya inda banto, la batshuya banda iyayayi la wekyelo boyadi banto wekyaka ankina nda iyedi inda baoi bana motshi, apha nda iyedi inda Kilisito. 9 La bolok'onda elodiamelo ena Ndjambi yulamaka nda djongi dinandi, 10 la inyo lombokokyama m'el'andi, bondoyadi botsha bonda bankumu baumela la bakulaki baumela. 11 O la inyo lombotenyama bonsonso el'andi la botenelo bophokelami la bakata, inda yimola djongi dinda bounu nda botenelo bonda bonsonso bonda Kilisito; 12 lombokundama l'andi na mbatisa, lomboyuta yetshwa la andi nda yimedya bokambelo boki Ndjambi akambaka nda yoetola m'atei anda bawaki. 13 o la inyo, m'aki inyo nda bewedi bonda baoi banda bembe, o lototenama bonsonso nda bounu boninyo, andi aoletola etenyi ephoko l'andi, aotophophedya boseketano bouma; 14 aophophya bekotelo benda baoi bana ingembe betobolelaki, betokweya mbalaka; aolimola eko ma mboka endiso, la andi okokomaki eko nda kuruse enandi; 15 andi otekyaki bakulaki o la bankumu, ondasokaki nda baisho banda bankumela, aolalokodya shenda bone aolila iyo boledya.

16 Sheko, lotimediyaki bonto dilokandodya nda djoji dinda dila toma, nkina dimela, nkina nda djoji dinda dilambo, nkina walelo bona nshongi, nkina nda yina enda Sabado; 17 baiko bale badidingi banda am'aoi baokoyaka; bokupha bonda baoi bole nko ele Kilisito. 18 Lotimediyaki bonto diloponola bokakaya boninyo la baoi banda batshuya, nda dikela esangedya enandi munge, nda diyakitedya, la botombolelo bonda bandjelo, nda yasa dilimbitela baoi batophisholama; aoyaumbya nda wanyi bonda bounu, 19 ayi aphodiyami la botsha. Boko bokambelaka bokupha bonda djongi inda diko dimamana etenyi ephoko la yeshi enda diko la eshisha enda diko, la diko yolaka laelodyamelo ena Nkumundjeyi.

20 Nkina inyo lombowela djomba dina motshi, inyo la Kilisito, sheleko enimedya inyo dingembe dinda diko shenda banto bayadi yiyilamaka nkoko? tokataki, tokodyaki la borumvu, tolengaki; 23 (diko dile la diwanya dina mpima nda diyakitedya nda etombolelo, la diyatshidya, la diyashingya nda djongi, la diyangana dimemya) la ngaiko, nda dishashadya bounu.

Tshapita 3

1 Sheko, nkina inyo lombetshwa etenyi ephoko la Kilisito, lasaka baoi bale nd'adiko mpene endudi Kilisito nda lo londa bolomi bona Ndjambi; 2

lokanedyaka mpima enda baoi bale nd'adiko, apha enda baoi bale na motshi; la boloko onda inyo lombowa, la lomo loninyo lombishama la Kilisito ele Nkumundjeyi. 4 Anenyalomi Kilisito ondoyadi lomo londiso, o la inyo lokenyalomi la andi nda ditombya.

5 Dika diko lodjakaka tompudi toninyo tole na motshi; bokelo, mindu, mposa ena bombe, dilula la bonkita; boko boyadi nga dimemya bete. 6 La boloko onda baoi basoko nkele ena Nkumundjeyi ekokundodya bana banda diphedya. 7 O la inyo loyaki ikendaka nda baoi baiko akinyo akelaka bekeledi besoko.

8 Ko etambene limolaka baoi ane baumela ma berumve beninyo; nkele, bompele, dilephola, bosudu la baoi bana nsonyi. 9 Lotosangelaki baoi banda bopoto la boloko bonda inyo lomimola bonto bonda elengelengi la bekeledi benandi, 10 lombolota bonto bond'oto, kil'oto la weyi bonda iyedi inda diwanya dina One ondotongaki. 11 Bosi Ngilika bophako nkina bosu Sikiya, nkina bontamba, nkina boyakataki; ayi Kilisito ayadi bya la nda betema benda bya.

12 Nda ditshina dine, oshenda basonami bana Ndjambi, bakidiyami o la balangami, lolotaka betema benda ishei, la bokapha, la diyakitedya, la etshukumadi, la botshidingano. 13 Lookanaka lokesedi, lophophedyanaka; nkina bonto la wina bonandi djoi, shene eki Kilisito alophophedyaka bembe, lokelanaka nko shiko. 14 Nd'oso onda baoi baumela loyalaka la lolango; loko loyadi elembelo elekola dikomana baoi. 15 Limedyaka wee bonda Kilisito yulela nda betema beninyo; lombetama nda djoi diko nda djongi diphoko; luteyaa Nkumundjeyi elunga.

16 Limedyaka djoi inda Kilisito dilodya betema beninyo la mpamba bya o la mpima bya; lekyanaka, lolakanaka la nyembo la wembelo la disemba dina Nyuma; lembelaka Nkumundjeyi la diyota nda betema beninyo. 17 Baoi baumela bakela inyo, nkula botephelo nkula bokeledi, lokelaka baumela nda dina dina Nkolo Yeso nda yuteya Ndjambi Apha elunga nda dina dinandi.

18 Baadi, lokitelaka balomi baninyo shene ekomana nd'oso ona Nkumu. 19 Inyo balomi, lookaka baadi baninyo lolango, lotaokaki bosudu. 20 Bana, lambodyaka baoi banda baotshi baninyo nda bekeledi beumela, nd'itshina inda djoi dine diyadi ishashadyaka Nkumu. 21 Baapa, lotokyaki bana baninyo nkele, baphoyowa la bompele. 22 BAntamba, lambodyaka bankolo baninyo banda baongi la baoi bauma; lotokambaki bolimo bonenama phe nko nda baisho banda banto, inda yashashadya, ayi lokambaka la botema bophoko; lokambelaka Nkumu, lotokambelaki banto. 24 Leyaka mbo, Inyo lokamba bokakaya bonda bokitshwa m'ele

Nkumu, djoji inda inyo loyadi ikambelaka Nkolo Kilisito. 25 Bonto bonunga aokatalomi shene ekiandi wungaka; ko ishonodi iphako.

Tshapita 4

1 Bankolo, lokaaka bakwala baninyo shenda ekoki ele iyo la iyedi inda bolotshi; leyaka mbo, O la inyo loyadi la Nkolo ndaloola.

2 Lotshidinganaka nda yoonda Ndjambi; letshwaka nda eko la elunga. 3 Lotootshele o la isho, ina Nkumundjeyi ditopholadya wisho bonda ditephela lolaka, inda isho disanga djoji inda ishimo inda Kilisito; (emi ndjadi boshi lonkandju nda boloko onda diko), inda emi yishola shene ekomana emi ditephela.

5 Lokendaka la mpima nd'atei anda baiko bale n'andja; loyatshongolaka djowa. 6 Botephelo boninyo boyali la diyota betsho beuma; lophongaka diyala la bokwa nkoko ina inyo yeya shene ekomana yuteya bonto bouma djoji.

7 Tukiko, wina bondiso la bonkambi bonda ditshidi, la bontamba la isho bona Nkumu, aokolosisela baohi banami baumela. 8 Ndolosokokodya nko la djoji diko, la dina andi yeya shene eyadi inyo o la dina andi dilokembya nda betema beninyo. 9 Onesimo, wina bondiso bonda ditshidi la bolangami bondiso, la bomodi boninyo menge, aokoyaka la andi. Iyo baokolosangela baohi bandiso bana ondoko baumela.

10 Alisitako, wina bonami bontamba alodinga, o la Mako, bondotshwa la Banabasi; emi ndolokekemya la boloko ondandi nd'oso;(manga ayakalomandi, lambaka andi bolotshi), o la Yeso ondola iyo mbo, Yusto, baina banami ma baiko batenama bonsonso. 11 Iyo bantulu bayadi bankambi l'emih nda waphemelo bona Ndjambi, la iyo baonkembya bolotshi. 12 Empaphala aolodinga; andi ayadi wina boninyo bontamba bonda Kilisito Yeso; andi ayadi yunelakinyo boshela la ditshidi, nda ilootshelaka ina inyo dikemba la dikomana bolotshi nda disangedya dina Nkumundjeyi. 13 Emi ndjadi wenyi bonandi mbo, Andi ayadi dilokambelaka phala o la inyo o la baiko bale nda Layodikiya o la Yelapoli. 14 Luka, nkanga elangami, alodinga, andi la Demasi. Lotodingelaka baina bandiso nda Layodikiya, o la Nimpa la Ekelezia eyadi isanganaka okandi. 16 Ashilalominyo yalola bonkanda bone, lophongaka yalodya boko o la basi Layodikiya. 17 Losangelaka Alakipho mbo, Phalaka bolotshi bokambelo boki we wambaka m'ele Nkumu, inda we yokkokya. 18 Bodingelo bone ma bakata banami, emi Paulo. Lophwaka nkandju inami. Diyota dinda diphepha diyali la inyo.